

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1044 del 20/04/2026

L Istitut Cultural Ladin domana neva compojzions per ladin ai cores fascegn, da manèr ite dant da la fin de jugn.

I cores de Fascia chiamé a produjer cianties neves con TrasLaMusega “Ciantèr fascian”

[Ladino] L Istitut Cultural Ladin “Majon di Fascegn”, per sie 50 egn de atività, l à lurà fora l projet TrasLaMusega per ge dèr amò più valor a l’arpejon de musega fascèna con proponetes vegnudes adalerch dai protagonis enstesc.

TrasLaMusega "Ciantèr fascian" se ouc a duta la oujes ciantarines de la val. La scomenzadiva, peèda via ja al scomenz del an, la enten engaissèr la creatività e la identità di gropes medemi, envié a portèr dant compojzions neves e originèles, adatèdes per sia formazions vocales, duran tes ja publiché o tes scric da pe su per chesta ocasion te un di idiomes del fascian.

La cianties neves les cognarà esser consegnèdes dant dai 30 de jugn, duran l form endrezà aldò, a la leta sul sit del Istitut Cultural Ladin (www.istladin.net).

D’uton l projet se serarà su con n concert – event finèl en domenia ai 8 de november 2026 da les 5 da sera, ló dal Teater Navalge de Moena, olache duc i cores e la formazions de oujes che à tout pèrt a la scomenzadiva, i sarà envié a ciantèr dal vif la ciantia che i à portà dant.

Apede a la region Autonoma Trentin – Sudtirolo che à sostegnù dut l projet TrasLaMusega, chesta ultima pèrt dedichèda ai cores l’ à podù se emprevaler ence del prezios didament del Comun de Moena e del Comun General de Fascia.

I protagonis del projet TrasLaMusega se à binà a una te n grop de lurier che se à pissà de più scomenzadives che se ouc a targets desvalives. Tel jir de doi egn, chesta l é la terza proponeta del projet che se concentra sui cores e su la formazions de oujes per smaorèr l repertorie de cianties per fascian.

La oujes ciantarines de Fascia, che se dèsc ju tant tel ciamp liturgich di cores da gejjia, che te chel profan e da spas di gropes polifonics e di cores da mont, podarà portèr dant neva cianties a più oujes, con o zenza compagnament de strumenc.

Endèna l event ai 8 de november te Teater Navalge l publich te sala l ge darà la stima a la mior compojzion e vagnarà menzionà ence i tes neves de maor valuta.

L Comun General de Fascia l à recognosciù l empegn di cores al ben de la valorisazion del lengaz ladin tel chèder del “Pian organich de politica linguistica e culturèla”.

La partidures completes e i tes de la cianties neves i sarà metui a la leta di cores e de duc i enteressé sul sit de la Mediateca Ladina, per ge dèr amò più luster.

De outra enformazions sun chesta scomenzadiva se pel les troèr sul sit del Istitut Cultural Ladin, su la piata <https://www.istladin.net/ld/e/141>

Traduzion di Servijes Linguistics del Istitut Cultural Ladin de Fascia

(pc)